

REPUBULIKA Y'U RWANDA



MINISITERI Y'IBIKORWAREMEZO

PO. BOX: 24 KIGALI

E-mail: info@mininfra.gov.rw

Kigali, kuwa ... 16 JUN 2015

Ref N° 9.3.7/Cab.M/015

Chairman w'Urugaga Nyarwanda rw'Abikorera (FRSP)

KIGALI

Bwana Chairman

Impamvu: Kubahiriza ibikubiye mu Itegeko N° 26/2012 ryo kuwa 29/06/2012, rigenga imirimo y'abahanga mu guhanga inyubako n'iy'abahanga mu by'ubwubatsi rikanashyiraho ingaga z'abakora iyo myuga mu Rwanda

Nshingiye ku Itegeko N° 26/2012 ryo kuwa 29/06/2012, rigenga imirimo y'abahanga mu guhanga inyubako n'iy'abahanga mu by'ubwubatsi (Architects and Engineers) rikanashyiraho ingaga z'abakora iyo myuga mu Rwanda mu ngingo zaryo, iya 1, iya 6, iya 7, iya 8, iya 9, n'iya 12;

Maze kubona ko abakora imirimo y'Abahanga mu guhanga inyubako n'iy'abahanga muby'ubwubatsi kenshi batubahiriza ibiteganywa n'itegeko rivugwa haruguru kugira ngo bashobore gukora iyi mirimo;

Mu buryo bwo kwubahiriza ibikubiye muri iri tegeko no kvanaho akajagari muri iyo myuga,

Nejejwe no kubandikira nifuza kubibutsa ibikubiye mu Itegeko kandi nkabasaba ko mwashishikariza imbaga y'Abikorera kwubahiriza ibirikubiyemo.

Muri urwo rwego, nasabaga by'umwihariko kwubahiriza ibikubiye muri izi ngingo z'Itegeko zikurikira, igihe cyose inzego z'Abikorera zifite ibikorwa bijyanye n'imirimo y'abahanga mu guhanga inyubako n'iy'abahanga mu by'ubwubatsi:

Ingingo ya 6 y'Itegeko N° 26/2012 ryo kuwa 29/06/2012, rigenga imirimo y'abahanga mu guhanga inyubako n'iy'abahanga mu by'ubwubatsi rikanashyiraho ingaga z'abakora iyo myuga mu Rwanda iteganya ibisabwa **ku munyarwanda** kugira ngo umuntu yemererwe gukora umwuga w'ubuhanga mu guhanga inyubako cyangwa uw'ubuhanga mu by'ubwubatsi. Iyo ngingo igira it:

“Umuntu wemererwa gukora imirimo y'ubuhanga mu guhanga inyubako cyangwa imirimo y'ubuhanga mu by'ubwubatsi mu Rwanda, agomba kuba yujuje ibi bikurikira :

1° kuba ari Umunyarwanda ;

2° kuba afite impamyabumenyi nibura ihanitse mu byo guhanga inyubako cyangwa mu by'ubuhanga mu by'ubwubatsi ;

3° kuba yemewe n'urugaga rw'umwuga w'abahanga mu guhanga inyubako cyangwa urugaga rw'abahanga mu by'ubwubatsi ;

4° kuba yujuje ibindi bisabwa n'amategeko y'urugaga rw'abahanga mu guhanga inyubako cyangwa ay'urugaga rw'abahanga mu by'ubwubatsi.

Ingingo ya 7 y'iryo tegeko yo iteganya ibisabwa **abanyamahanga** kugira ngo bemerewe gukora umwuga w'ubuhanga mu guhanga inyubako cyangwa uw'ubuhanga mu by'ubwubatsi mu Rwanda aho igira iti :

Umunyamahanga usaba gukora imirimo y'ubuhanga mu guhanga inyubako cyangwa imirimo y'ubuhanga mu by'ubwubatsi mu Rwanda, agomba kuba yujuje ibi bikurikira :

1° kuba afite impamyabumenyi imwemerera gukora uwo mwuga ;

2° kuba yanditse mu rugaga rw'abakora iyo mirimo mu gihugu yakoreragamo ;

3° kuba afite ubwenegihugu bw'igihugu gifitanye amasezerano yemerera Abanyarwanda gukora uwo mwuga.

Urugaga rw'umwuga rushobora guha umunyamahanga w'umuhanga mu guhanga inyubako cyangwa umunyamahanga w'umuhanga mu by'ubwubatsi uruhushya rw'igihe kugira ngo akore umurimo ugenywe ariko **nk'ufatanyije n'umwe mu bagize urugaga.**

Iyo Urugaga rusanze hari impamvu zidasanzwe, rushobora guha Umuntu uruhushya rw'igihe kugira ngo akore adakeneye gufatanya n'ugize Urugaga, nk'umuhanga mu guhanga inyubako cyangwa umuhanga mu by'ubwubatsi uryozwa wenyine ibyo akoze.

Ibyerekeye **ukwemerera ibigo gukora imirimo y'ubuhanga mu guhanga inyubako cyangwa iy'ub'ubuhanga mu by'ubwubatsi biteganywa n'Ingingo ya 8** aho hateganyijwe ko :

« Ikigo cyose gikora imirimo y'ubuhanga mu guhanga inyubako cyangwa iy'ubuhanga mu by'ubwubatsi cyifuzaga gukorera iyo mirimo mu Rwanda, kigomba kubanza kubiharerwa uruhushya n'urugaga rw'umwuga w'ubuhanga mu guhanga inyubako cyangwa n'urugaga rw'abahanga mu by'ubwubatsi bitewe n'umwuga gikora.

Ibikurikizwa kugira ngo uruhushya ruvugwa mu gika cya mbere cy'iyi ngingo rutangwe bishyirwaho n'Urugaga ».

Ingingo ya 9 yo iteganya **ukwemerera ibigo byo mu mahanga gukora imirimo y'ubuhanga mu guhanga inyubako cyangwa iy'ubuhanga mu by'ubwubatsi ikabivuga muri ubu buryo :**

« Ikigo cyo mu mahanga gishobora kwemererwa gukorera mu Rwanda imirimo y'ubuhanga mu guhanga inyubako cyangwa iy'ubuhanga mu by'ubwubatsi iyo igihugu kibarurirwamo cyemerera nacyo ibigo byo mu Rwanda kugikoreramwo hakurikijwe ingingo ziteganywa n'amasezerano u Rwanda rwemeje, ahuza ibihugu byombi cyangwa agamije ukwishyirahamwe kw'ibihugu by'akarere.



Icyakora, ikigo cyo mu mahanga kigomba :

- 1° kuba cyanditse mu Rwanda nk'isosiyete yo mu mahanga hakurikijwe ibiteganywa n'amategeko yerekeye amasosiyete y'ubucuruzi;
- 2° kuba cyujuje ibindi bisabwa ibigo byo mu Rwanda »

Nshingiye ku bimaze kuvugwa haruguru, nongeye kubamenyesha ko nta wemerewe gukora imirimo y'abahanga mu guhanga inyubako n'iy'abahanga mu by'ubwubatsi mu Rwanda atubahirije ibiteganywa n'itegeko N° 26/2012 ryo kuwa 29/06/2012, rigenga imirimo y'abahanga mu guhanga inyubako n'iy'abahanga mu by'ubwubatsi rikanashyiraho ingaga z'abakora iyo myuga mu Rwanda.

Urugaga rw'abahanga mu guhanga inyubako n'urugaga rw'abahanga mu by'ubwubatsi bashinzwe gushyira mu bikorwa ibiteganywa n'itegeko rivugwa, bityo abakora iyo myuga bagasabwa kubegera kugira ngo bubahirize ibyo basabwa n'Itegeko mu Rwanda.

Mugire Amahoro n'Akazi keza

MUSONI James
Minisitiri w'Ibikorwa Remezo

Bimenyeshejwe :

- Nyakubahwa Perezida wa Repbulika
- Nyakubahwa Minisitiri w'Intebe
- Bwana Minisitiri w'Ubucuruzi n'Inganda
- Bwana Umuyobozi Mukuru wa RDB/Ugize Guverinoma
- Urugaga rw'Abahanga mu guhanga inyubako(IAR)
- Urugaga rw'Abahanga mu by'ubwubatsi (IER)

KIGALI